

3. gr.

2. málsl. 1. mgr. 9. gr. reglugerðarinnar orðist svo:

Sé ekki komið með bifreið til álestrar á tilskildum tíma skal innheimtumaður leggja dagsektir á eiganda eða umráðamann bifreiðar er nemi 300 kr. á hvern dag sem líður frá þeim tíma sem ákveðinn er til álesturs skv. 8. gr. í allt að 30 daga, eða þar til komið er með bifreiðina til álestrar sé það fyrr.

4. gr.

Reglugerð þessi sem sett er skv. lögum nr. 3/1987 um fjáröflun til vegagerðar, sbr. lög nr. 5/1987, öðlast gildi 1. janúar 1992.

Hækkun gjalds fyrir hvern ekinn kílómetra, sbr. 2. gr. tekur þó gildi strax að loknu 1. álesturstímabili sem er frá 20. janúar til 10. febrúar 1992, sbr. 8. gr. Sé ekki komið með bifreið til álestrar á réttum tíma skal reikna út meðaltal ekinna kílómetra á dag á tímabilinu milli álestra. Af meðaltalsakstri sem samkvæmt þessu hefur átt sér stað eftir lok 1. álesturstímabils skal innheimta hið hækkaða gjald.

Fjármálaráðuneytið, 9. desember 1991.

Friðrik Sophusson.

Rúnar Hannesson.

AUGLÝSING

**um starfsleyfi fyrir móttöku og förgun úrgangs
á Blönduósi og nærsveitum.**

1. ALMENN ÁKVÆÐI.

- 1.1. Starfsleyfi þetta gildir fyrir móttöku, flokkun, endurvinnslu, og eyðingu úrgangs á Blönduósi og nágrenni.
- 1.2. Um varnir gegn skaðlegum áhrifum á starfsmenn og starfsumhverfi fer samkvæmt lögum nr. 46/1980 um aðbúnað, hollustuhætti og öryggi á vinnustöðum.
- 1.3. Rekstraraðila er skylt að sjá um, að fyllstu snyrtimennsku og góðrar umgengni sé gætt á athafnasvæðunum. Úrgang og annað rusl, svo sem pappír og plast, sem kann að berast út fyrir athafnasvæðið skal hreinsa upp jafnóðum.
- 1.4. Opin brennsla er óheimil á athafnasvæðunum. Óski rekstraraðili að koma upp brennsluofni þarf að fá sérstakt starfsleyfi fyrir slíkan rekstur.
- 1.5. Óski rekstraraðili eftir því að gera umtalsverðar breytingar á rekstrinum, skal sækja um nýtt starfsleyfi til Hollustuverndar ríkisins, í samræmi við ákvæði mengunarvarnareglugerðar nr. 389/1990.
- 1.6. Komi fram mengun, frá starfseminni, sem ekki er í samræmi við gögn sem lögð eru fram með umsókn um starfsleyfi er rekstraraðili ábyrgur fyrir því að stöðva áframhaldandi mengun, á sinn kostnað, og hreinsa þá mengun sem þegar hefur orðið.
- 1.7. Mengunarvarnir Hollustuverndar ríkisins geta, að höfðu samráði við heilbrigðiseftirlit Norðurlands vestra, lagt til við umhverfisráðherra að starfsleyfi þetta verði endurskoðað, ef í ljós kemur að frá starfseminni sé hætta á skaðlegum áhrifum á heilsufar almennings eða röskun lífríkis.

- 1.8. Ákvæði laga nr. 81/1988, um hollustuhætti og heilbrigðiseftirlit svo og mengunarvarnareglugerðar nr. 389/1990, gilda um starfsemina eftir því sem nánar er fyrirmælt í starfsleyfi þessu.

2. ÁKVÆÐI TIL VARNAR MENGUN YTRA UMHVERFIS.

2.1. Móttaka- og flokkun úrgangs.

- 2.1.1. Starfsleyfi þetta gildir fyrir móttöku og vinnslu neyslu- og framleiðsluúrgangs svo og sérstaks úrgangs. Óheimil er móttaka sóttnáms úrgangs, geislavirks úrgangs, svo og sprengiefna, nema með sérstöku starfsleyfi. Koma skal upp móttöku á spilliefnum í samræmi við ákvæði þar um.
- 2.1.2. Við athafnasvæðin skulu vera skilti með greinilegri áletrun um afgreiðslutíma og hvar móttaka einstakra efna fer fram.
- 2.1.3. Á þjónustusvæðinu, skal hlutast til um að komið verði á, á heppilegum stöðum, söfnunaraðstöðu (gámum eða öðrum ílátum) þar sem almenningur og smærri fyrirtæki geta losað sig við flokkaðan úrgang sem m.a. gæti nýst til endurvinnslu eða annarar nýtingar. Koma skal upp leiðbeiningaskiltum með upplýsingum um flokkun úrgangsins eftir því sem ákveðið kann að vera hverju sinni. Í samráði við viðkomandi sveitarfélög, skal koma greinargóðum upplýsingum til almennings um rekstur og tilgang þessara söfnunarstöðva.
- 2.1.4. Þeir aðilar, sem framleiðsluúrgangur og sérstakur úrgangur fellur til hjá, sjá um alla meðferð og aðflutning úrgangsins í samráði við rekstraraðila og viðkomandi heilbrigðisnefnd. Rekstraraðili skal leiðbeina og sinna upplýsingaskyldu til sveitarfélaga og annarra er málið varðar um söfnun og aðflutning neysluúrgangs. Jafnframt skal rekstraraðili upplýsa viðkomandi heilbrigðiseftirlit um slík mál einnig ef eitthvað fer úrskeiðis við starfsemina. Leggja skal áherslu á nýtingu úrgangsefna til endurvinnslu.
- 2.1.5. Brotamálma skal endurvinna eða koma til endurvinnslu eftir því sem tók eru á. Áður en vinnsla fer fram skal fjarlægja alla vökva úr bifreiðum, vélum, þrýstikerfum og tækjum, s.s. smurolíur, þrýstioliur, kælivökva og eldsneyti. Vökva þessa skal endurnýta eftir því sem kostur er á, en að öðrum kosti farga reglum samkvæmt.
- 2.1.6. Fjarlægja skal freon og halon af öllum búnaði, þar sem það er notað sem kæli- eða slökkviefni, sem berst til förgunar. Skal það gert með tækjum sem tryggja að efnin berist ekki út í umhverfið. Tegundum skal haldið aðskildum og þær geymdar í ílátum sem Hollustuvernd ríkisins hefur viðurkennt til slíkra nota. Allt freon og halon skal fara til endurvinnslu.
- 2.1.7. Koma skal upp sýruheldum söfnunarílátum til móttöku á notuðum rafgeymum og rafhlöðum, sem síðan skal komið til endurvinnslu eða í móttökustöð fyrir spilliefni, þannig að tryggt sé að þessu sé fargað sem umhverfisskaðlegum úrgangi.
- 2.1.8. Gengið skal, með efnagreiningu, úr skugga um að allir rafspennar, rofar og þéttar, sem tekið er á móti innihaldi ekki PCB, þetta skal framkvæmt áður en olía af búnaði er fjarlægð. Ef olía sem hefur verið fjarlægð, af slíkum búnaði, inniheldur meira en 50 ppm af PCB skal henni fargað sem umhverfismengandi úrgangi. Ef kælivökvi eða olíur úr búnaði innihalda meira en 2000 ppm af PCB er vinnsla búnaðarins óheimil og ber að farga honum samkvæmt fyrirmælum Mengunarvarna Hollustuverndar ríkisins. Sýnataka og efnagreining skal framkvæmd af aðila sem er viðurkenndur af Mengunarvörnum Hollustuverndar ríkisins. Kostnaður af sýnatöku og eyðingu hættulegra efna skal greiðast af eigendum slíkra efna.

- 2.1.9. Á svæðum þar sem vökvar eru tæmdir af bifreiðum, bifreiðahlutum, vélum og öðrum slíkum búnaði, einnig þar sem unnið er með rafspenna, rofa eða þetta skal vera steipt undirlag. Á fráveitu frá þessum undirlögum skulu vera olíuskiljur.
- 2.1.10. Stærð og gerð olíuskilju skal miðast við að olía í fráveituvatni sé ekki meiri en 15 mg/l. Aðstaða skal vera til sýnatöku af fráveituvatni þar sem það kemur úr olíugildrum.
- 2.1.11. Neysluúrgang og þann hluta framleiðslu- og sérstaks úrgangs sem ekki verður nýttur eða endurunninn skal flytja til urðunar í lokuðum gámum eða vögnum.
- 2.1.12. Koma skal upp móttökuaðstöðu og þjónustu þar sem almenningi gefst kostur á að losa sig við spilliefni. Móttökuaðstaða skal vera læst utan þess sem opnað er fyrir einstaka viðskiptavini.
- 2.1.13. Spilliefnum og hættulegum efnum, skv. viðauka 4. í mengunarvarnareglugerð, skal safna, pakka og búa til flutnings til viðurkenndrar móttöku og eyðingar fyrir slíkan úrgang. Í samvinnu við heilbrigðiseftirlit Norðurlands vestra og Hollustuvernd ríkisins skal rekstraraðili standa fyrir kynningu og reglulegri innsöfnun á slíkum úrgangi. Kynning þessi skal ná bæði til almennings og fyrirtækja.
- 2.1.14. Sérstök ídræg efni skulu vera til staðar til að hreinsa upp olíu- og leysiefnaúrgang sem hafa farið til spillis. Haga skal aðstöðu við móttökusvæði spilliefna á þann veg að í stað fráveitu frá því svæði séu öll fljótandi spilliefni sem hugsanlega fara niður fönguð með ídrægum efnum eða fönguð í lokaða tanka, þaðan sem hægt er að ná þeim til baka.
- 2.1.15. Þeir aðilar sem annast flutninga á spilliefnum fyrir rekstraraðila skulu hafa til þess viðurkenndan búnað. Rekstraraðili skal upplýsa heilbrigðiseftirlit Norðurlands vestra um störf flutningsaðila og fá samþykki fyrir búnaði þeirra.
- 2.1.16. Verktakar sem hugsanlega annast þjónustu við úrgangsmeðhöndlun fyrir rekstraraðila skulu hlýta ákvæðum starfsleyfis þessa hvað mengunarvarnir varðar.
- 2.1.17. Gera skal viðeigandi ráðstafanir til að varna foki á þeim efnum sem endurunnin eru og geymd á útisvæði eftir vinnslu.
- 2.1.18. Fyrirbyggja skal að vargfugl eða meindýr taki sér bólfestu eða eigi sér viðverustað á athafnasvæðum rekstraraðila.
- 2.1.19. Takmarka skal umhverfishávaða frá starfseminni eftir því sem kostur er. Hávaði við lóðamörk skal ekki mælast meiri en 70 dB(A) Leq. Ef um greinilega ríkjandi tón eða reglubundna hávaðatoppa er að ræða skal lækka mörkin um 5 dB(A) Leq.

2.2. Urðunarstaður við Draugagil.

- 2.2.1. Förgun úrgangs, eftir meðhöndlun í móttökustöð, fari einungis fram á þar til útbúnum stað, þ.e. á urðunarstað við Draugagil. Svæði þetta skal vera girt vandaðri girðingu.
- 2.2.2. Takmarka skal aðgang að urðunarsvæðinu annarra en eftirlitsaðila og þeirra sem starfa á vegum rekstraraðila.
- 2.2.3. Ekki skal vera nema eitt urðunarsvæði í notkun samtímis. Með urðunarsvæði er átt við afmarkaðar urðunarreinar sem ekki ná yfir stærra svæði en 1000 m². Fráveituskurðir skulu vera umhverfis urðunarreinar.
- 2.2.4. Tryggt skal að náttúrulegt leirlag í botni urðununargryfju sé vel þjappað og samfelld. Koma skal fyrir sýnatökubrunnum neðst í Draugagili.

- 2.2.5. Mengunarvarnir Hollustuverndar ríkisins geta í ljósi niðurstæða mælinga á mengun í vatni gert kröfur um hreinsun fráveituvatns.
- 2.2.6. Úrgangur sem lagður hefur verið í urðunargryfju skal þakinn samdægurs. Mótun þekjulags skal vera með þeim hætti að landsslagslýti verði ekki af. Þekjulag skal vera þétt og móta á sama hátt og umhverfið var fyrir urðun, gæta skal þess einnig við frágang að úrkomuvatn eigi greiða leið í fráveitu. Þykkt þekjulags skal ekki vera minni en 100 cm. Í efsta lag skal sá grasfræi.
- 2.2.7. Koma skal í veg fyrir fok á urðunarstaðnum. Fokvarnir skulu vera til staðar.
- 2.2.8. Fyrirbyggja skal að vargfugl og meindýr taki sér bólfestu eða eigi sér viðverustað á athafnasvæðinu.
- 2.2.9. Takmarka skal umhverfishávaða frá starfseminni eftir því sem kostur er. Hávaði við lóðamörk skal ekki mælast meiri en 70 dB(A) Leq. Ef um greinilega ríkjandi tón eða reglubundna hávaðatoppa er að ræða skal lækka mörkin um 5 dB(A) Leq.

3. MÆLINGAR OG EFTIRLIT.

- 3.1. Mengunarvarnir Hollustuverndar ríkisins hafa eftirlit með mælingum og mæliaðferðum, vegna hugsanlegrar mengunar. Sérstök úttekt skal fara fram á fyrsta ári starfseminnar. Leita skal samþykkis Hollustuverndar ríkisins vegna mæliáætlunar sem fer fram á vegum rekstraraðila. Nákvæmt mat á niðurstöðum og hugsanlegar samanburðarmælingar skulu fara fram í samræmi við ákvæði mengunarvarnareglugerðar nr. 389/1990, eins og hún er á hverjum tíma. Hollustuvernd ríkisins skal upplýsa rekstraraðila og heilbrigðiseftirlit Norðurlands vestra um niðurstöður matsins, eins fljótt og auðið er.
- 3.2. Rekstraraðili skal hafa á sínum vegum aðila sem hefur góða þekkingu á öllum búnaði og starfsreglum varðandi sorphirðu, endurvinnslu og sorpeyðingu. Aðili þessi skal einnig hafa þekkingu á ákvæðum starfsleyfis þessa og þeim lögum og reglum sem um starfsemina gilda. Eintök af starfsleyfi og viðkomandi lögum og reglum skulu ávallt tiltæk á vinnustað. Einnig skal rekstraraðili tilnefna fulltrúa sem eftirlitsaðilar, eða aðrir, geta haft samband við ef þörf krefur utan afgreiðslutíma starfseminnar.
- 3.3. Fulltrúar rekstraraðila skulu a.m.k. á þriggja ára fresti koma á sameiginlegan fund með fulltrúum frá Hollustuvernd ríkisins, Náttúruverndarráði og Heilbrigðisnefnd. Á þessum fundum verði rætt um niðurstöður eftirlits- og umhverfismælinga og rekstur mengunarvarna við úrgangsmeðhöndlunina og eyðingu.

4. GJALDSKYLDA.

- 4.1. Starfsemin fellur í þriðja gjaldskrárflokk samkvæmt viðauka nr. 8. í mengunarvarnareglugerð nr. 389/1990. Gjald þetta skal standa undir kostnaði við sérhæft eftirlit Hollustuverndar ríkisins, samanber þriðja kafla reglugerðarinnar.

5. GILDISTAKA.

- 5.1 Starfsleyfi þetta sem gildir til 1. janúar 1995 er veitt í samræmi við ákvæði greinar 8.4 í mengunarvarnareglugerð nr. 389/1990 samanber lög nr. 81/1988, um hollustuhætti og heilbrigðiseftirlit og öðlast þegar gildi.

Umhverfisráðuneytið, 9. desember 1991.

F. h. r.

Kristinn Sv. Helgason.

Sigurbjörg Sæmundsdóttir.